

Powšitkowne WOZJEWJENJA

njedźelu, 11. měrca 2018

Přiležnosć k swjatej spowědži w Róžeńće

sobotu, 17. měrca 17.00 – 18.00 hodź.	farar M. Anders, farar Šć. Delan, farar T. Dawidowski, farar B. Jakubaš
sobotu, 24. měrca 17.00 – 18.00 hodź.	farar M. Anders, farar W. Sćapan, farar D. Dzikiewicz, farar B. Jakubaš
póndźelu, 26. měrca 18.30 – 19.30 hodź.	farar M. Nawka, farar T. Dawidowski, farar G. Nawka, farar J. Magiera
wutoru, 27. měrca 18.30 – 19.30 hodź.	farar M. Anders, farar D. Dzikiewicz, farar G. Wornar, farar St. Börner

Přeco sobotu je do Božeje mše za lud a kraj, kotraž so we 8 hodź. zahaji, přiležnosć k swjatej spowědži.

Čitanje ze zběrki nowych powědančkow

Na čitanje z nowjeje antologije „Mlóče“ přeprašuje Ludowe nakładnistwo Domowina wšitkich zajimcow. Zarjadowanje wotměje so njedźelu, 11. měrca, w 15.00 hodź., na farje w Chrósćicach. Wudawačelka Ingrid Juršikowa zběrku předstaji. Z njeje budu Andreja Chěžcyna, Monika Dyrlichowa a Pětr Thiemann čitać. Jurij Smoła zarjadowanje hudźbnje na akordeonje wobrubu. Wopytowarjo móža sej knihu na městnje kupić a sej ju wot awtorow signować dać.

Dwójne spominanje na Michała Nawku

Składnostnje 50. posmjertnin Michała Nawki budže so pjatk, 16. měrca, w Radworju na njeho spominać. Započatk je we 18.30 hodź z Božej mšu. Do toho modla so tam wot 18 hodź. swjaty rózowc. Po kemšach su wšitcy na faru přeprašeni, hdžež budže so na njeho jako redaktora Katolskeho Posoła, wučerja, kěrlušerja a basnika zhladować. K tomu přeprašuje Towarstwo Cyrila a Metoda z.t. zhromadnje z Radworskej wosadu a Maćicu Serbskej. Maćica Serbska spomina přidatnje k tomu pjatk, 16. měrca, na skutkowanje swojeho něhdyšeho čłona. Wopominanje budže w 11 hodź. na Budyskim Mikławšku při jeho rowje.

Putnikowanje swójbow

Pjatu póstnu njedźelu, 18. měrca, budže putnikowanje swójbow do Róžanta. Započatk Božeje mše je w 9 hodź. Celebrant budže Ralbičanski farar Šćěpan Delan. Wšitke swójby, wšojedne kotreje staroby, su wutrobnje přeprašeni.

Młodžina kroči po křižowym puću

Serbscy młodostni budu bołmončku, 25. měrca, w Ralbicach zhromadnje stacije křižoweho puća rozpominać. Započatk je w 14 hodź. w cyrkwi. Přizamknje so swačina. Wšitcy su wutrobnje přeprašeni.

Póstny wopór młodžiny za projekt w Africe

Dekanatne dušepastyrstwo młodžiny we Worklecach podpěruje w tutym léće z póstnym woporom kubljanje młodych žonow a maćerjow w tansanskim Ifakaru. Z darami ma so „Community Center“, kotryž zmóžnja młodym zařdženym žonam a maćerjam šulu dokončić, so dale wukublać a powołanje nawuknyć sobu financować. Swój wopór móža młodostni w cyrkwi abo we Worklečanskim dekanatnym młodžinskim dušepastyrstwie wotedać. Móža pak jón tež pod hesłom „Ifakara“ na konto Bistum Dresden-Meißen Dekanatsstelle Räckelwitz; IBAN: DE65 7509 0300 0008 2948 79 přepokazać.

Hłowna zhromadźizna TCM

Předsydstwo Towarstwa Cyrila a Metoda z.t. (TCM) přeprašuje wšitkich člonow towarstwa, člonow sekcijow a korporacijow kaž tež zajimowanych hosći na swoju hłownu zhromadźiznu póndželu, 19. měrca, do Ralbic. Započnjemy w 19.00 hodž. z Božej mšu w cyrkwi. Přizamknje so zhromadźizna na „Radlubinje“. Sčěhowacy dnjowy porjad je předwidžany:

1. zahajenje
2. wólba nawody zhromadźizny
3. rozprawy předsydstwa, nawodow korporacijow a sekcijow
4. finančna rozprawa TCM a Katolskeho Posoła
5. rozprawa rewizijneje komisije
6. diskusija a schwalenje rozprawow
7. informacije k namjetej postajenja noweho pomnika zbóžneho Alojsa Andrickeho
8. diskusija
9. zakónčenje / modlitwa

Do a po hłownej zhromadźiznje změja člonojno składnosć, swój létny přinošk we wysokości pjeć eurow zaplaćić.

Wo najwuznamnišim serbskim misionaru

Mandželskaj Mechtild a Wolfgang Opel přednošujetaj k temje „Daloke horiconty: Jan August Měrcink – šewc, misionar, polarny slědžer“ štwórtk, 15. měrca 2018, w 19.30 hodž. w Budyskim hosćencu „Wjelbik“, Žitna 7, Kulturna wědomostnica a jeje mandželski, kotrajž staj jako knižnaj awtoraj hłownje w Kanadze žiwaj, předstajitaj wuslědki svojich lěta dołhich slědženjow za žiwjenjom a skutkowanjom najwuznamnišeho serbskeho misionara Ochranowskeje bratrowskeje jednoty. Přednošk budže w němskej rěči, zastup je darmotny.

Kak džěći aktiwnje zapřijeć

Čestnohamtscy pomocnicy a dalši zajimcy ze serbskich wosadow su na přednošk pod hesłom „Kak džěći za Boha zahorić?“ přeprašeni. Referent za džěćacu pastoralku Drježdžansko-Mišnjanskeho biskopstwa Stephan Schubert nawjaza wutoru, 20. měrca, na swój přednošk z lońšeho nowembra a chce so na tutym wječoru mjez druhim prašenju wěnować, kak móhli so džěći aktiwnje do Božej mše zapřijeć. Započatk je w 19.30 hodž. w Don Boskowym domje we Worklecach.

Do Lourdesa a Pólskeje

Přeprašuju na putniskej jězbje z busom wot srjedy, 4. apryla, do štwórtka, 12. apryla, do Lourdesa kaž tež wot srjedy do njedźele, 23. do 27. meje, do Wrocławja a Krakowa. Nadrobniše informacije dóstanu zajimcy pod telefonowymaj čislomaj (01 63) 7 33 82 05 abo (03 57 96) 9 54 28 (po 19 hodž.) abo pola mnje w Hórkach, Sydlišćowy puć 2.

Maćij Hadank